

সেমিনারে

অসংখ্য মানুষের ভীড়ে হারিয়ে যায় সত্ত্বা
সবাই কিছু বলতে চায়, অগুস্তি বক্তা।
খাঁটি সোনা মিশে যায় রাশি রাশি ধুলায়
ধনাত্য ভাবনা কতোই মাটিতে গড়ায়!

যত্নে-চিন্তায় গড়া যতো ঝুড়ি ঝুড়ি বুদ্ধি
শোনে না শ্রোতা মন দিয়ে, থাকে নাকো শুদ্ধি।
অঙ্কুরিতের বেদনায় আকুলিত আশা
শত সহস্র বাধাতেও বাঁধতে ব্যস্ত বাসা!

তুমি আমি দূরে-কাছে অনেকে আছে-
নিজেকে প্রকাশিতে কে না ভালবাসে?
বাঁচার তাগিদ বড়-একেলাই যুঝি
অসংখ্য ভীড়ের মাঝে 'অক্সিজেন' খুঁজি!

এযাবৎ যেথা গেছি দাঁড়কাক ডাকে!
কোকিল, টিয়া, কাকাতুয়া কদাপি বা থাকে!
অধিকতর জাবর কাটে পুরোনো যত ঘাসে,
তরুণ, সুন্দর, প্রতিভাদীপ্ত কশ্চিৎই আসে।

নতুন কিছু আলাপ হয় সেমিনারের ফাঁকে
কিছু কাল আলাপন প্রাণবন্তও থাকে!
সর্বাধিক এই লাভ সেমিনারে পাই
এর অধিক এখনো তো আমার হয় নাই!